

IN MEMORIAM

PROF. DR. SRĐAN JANKOVIĆ (1926-1996)

Srđan Janković, redovni profesor Filozofskog fakulteta u Sarajevu u mirovini, umro je 22. 12. 1996. godine.

Srđan Janković je rođen 28. 9. 1926. godine u Drvaru, gdje je završio osnovnu školu. Od 1937. godine pohađa Prvu mušku realnu gimnaziju u Sarajevu i završava četiri razreda do izbivanja rata, kada se sa porodicom seli u Beograd gdje provodi ratne godine. Za to vrijeme je završio V, VI, i VII razred gimnazije. Nakon duže bolesti i liječenja maturirao je u Sarajevu 1952. godine. Iste godine upisao se na studij orijentalnih jezika na Filozofskom fakultetu u Sarajevu, na Katedri za orijentalistiku. Diplomirao je 1959. godine, a 1960. izabran je za asistenta za arapski jezik. Od 1960. do 1963. provodi tri godine na specijalizaciji arapskog jezika u Kairu, gdje je dvije i po godine predavao naš jezik na Visokoj školi za strane jezike u Kairu.

Godine 1976. odbranio je doktorsku tezu "*Diglosija u savremenom arapskom*" na Filozofskom fakultetu u Sarajevu. Od 1977. godine radi kao vanredni profesor za arapski jezik na Odsjeku za orijentalistiku Filozofskog fakulteta u Sarajevu, a 1983. godine izabran je u zvanje redovnog profesora. U mirovini je prof. Janković otišao 1991. godine, ali je svoje obaveze na Fakultetu, Odlukom Nastavno-naučnog vijeća, nastavio obavljati sve do januara 1993., kada je zbog brutalne agresije na Sarajevo i teških uslova života otišao u Beograd.

Pored obaveza na Filozofskom fakultetu prof. dr. Srđan Janković je obavljao i čitav niz drugih funkcija: u okviru aktivnosti Instituta za jezik i književnost učestvovao je sa referatima na gotovo svim savjetovanjima koje je Institut organizovao (Mostarsko, Tuzlansko, Trebinjsko, Bihaćko, Neumsko); bavio se pitanjima književnojezičke politike u BiH; četiri godine prof. Srđan Janković je bio predsjednik Društva za primjenjenu lingvistiku BiH. Prof. dr. Janković je i jedan od osnivača SALK-a (Sarajevskog lingvističkog kružoka) na kojem je održao niz predavanja. Saradivao je sa Orijentalnim institutom u Sarajevu i bio član njegovog Savjeta i Naučnog vijeća. Pored ovoga uzeo je učešća na mno-

gim naučnim i stručnim skupovima (2. i 3. onomastička konferencija Jugoslavije, kongresi Saveza društava za primjenjenu lingvistiku Jugoslavije itd.)

Prof. dr. Srđan Janković je objavio čitav niz radova u stručnim i naučnim časopisima: *Bibliotekarstvo*, *Radovi Filozofskog fakulteta u Sarajevu*, *Pregled*, *Odjek*, *III program Radio-Beograda*, *Književni jezik*, *POF*, *III program Radio-Sarajeva*, *Naše teme*, *Izraz* itd.

Kao rezultat veoma plodnog rada prof. Jankovića kao arabiste i lingviste objavljena je knjiga *Arapski izgovor sa osnovama arapskog pisma* (Sarajevo, 1987.), koja predstavlja prvu sistematsku fonetiku arapskog jezika kod nas. Sama lista upotrijebljene naučne literature govori o stručnoj obaviještenosti dr. Jankovića, o njegovoj kritičkoj sposobnosti da ostane na razini onoga što je postignuto u svjetskoj lingvistici te da se, u okviru kontrastivnog upoređenja fonetike našeg i arapskog jezika, uputi u nova istraživanja i otkrivanja novih aspekata i novih momenata u okviru ove problematike. Dr. Janković je sve ovo ostvario s mjerom, ukusom i odgovornošću svjetskog znanstvenika. Ovom studijom je na izvjestan način napravljena neka vrsta preokreta u izučavanju arapske fonetike i arapskog jezika uopšte na ovim prostorima.

Profesora Jankovića će pamtili mnoge generacije studenata, postdiplomaca i doktoranata kojima je on svesrdno pomagao da prevaziđu teškoće svojstvene svakom onom ko se ozbiljno bavi naučnim radom. Smrt prof. Jankovića ostavila je veliku prazninu u oblasti arabistike, lingvistike i drugih oblasti kojima se profesor Janković bavio ne samo na prostoru BiH nego i šire.

Amir Dervišević